

er habe zweyhundert / zwey vnd fünffzig tausend Stadia in seinem Vmbkreiß / nach des Ptolomæi, welcher ihm hundert vnd achzig tausend Stadia gibt: nach des Dionysidori, so zweyhundert vnd fünffzig Stadia zum Vmbkreiß rechnet: Darzu Plinius noch siebentausend hinzu thut / damit seiner Meinung nach / die natürliche Harmonia erfüllet werde / vnd die Erde das neunzig tausendste Theil des ganzen vniuersi sey) hat er nach Beweisung der jetziger Zeit Mathematicorum, ein vnd dreissig tausend / vnd fünffhundert Meylen. In der Breyte aber vngesährlich zehntausend vnd zweyhundert vnd zwanzig Meylen. In der dicke / von dem centro bis her auff zu vns vff die superficiem, fünfftausend vnd ehlff Meylen.

Nach dem nun der ganze Erdboden in sechs vnterschiedliche Theil vnterschieden / will ich nunmehr einen Theil nach dem andern / so viel als ein Discurs leyde mag / nach einander beschreiben / vñ an Asia den Anfang machen / als welches das grösste ist vnter allen. Dieses Theil der Welt ist also genennet worden von Asia einer Tochter Oceani vnd Thetidis, welche des Iapeti oder Japhets Weib gewesen. Hat seine Grenzen vnd Terminen auff allen seitten. Gegen Auffgang wird es von Africa geschieden mit einer linea von dem Promontorio Samonio, bis an das rothe Meer: Von dannen durch gemeldtes Meer / bis an die Insulam S. Laurentii, das gemelte Insul in Africa bleibe. Gegen Niedergang wird es von Europa abgesondert / durch eine Lineam von vorgemeltem Promontorio Samonio so in Candia ligt / durch das mare Aegæum, von dannen durch Hellespontum, Propontidem, Bosphorum Thracium, durch Pontum Euxinum, durch Bosphorum Cimmerium, durch Paludem Maotidem vnd durch den Fluß Tanain, ge-

zogen. Gegen Mittag vnd dem Polo Antartico, wirdt es von denselbigen Ländern abgesondert mit einer Linien / so von dem Meer bey der Insula S. Laurentii gegen Mittag / durch das Meer Machian bis bey die Insulas Moluccas wird gezogen. Gegen Auffgang wirdt es von America abgescheiden mit einer Linien / so von dem Meer der Moluccarum, gegen Mitternacht / durch das Meer Chinan, vnd durch die Enge Anian bis in das Mitternächtliche Meer gezogen wirdt. Von Grunlandia wird es auch gegen Mitternacht abgesondert mit der linea, so zuvor durch die Enge Anian in das Mitternächtliche Meer / von dannen gegen Niedergang durch den Oceanum Scythicum, bis in das Meer Drobasaf, gezogen wirdt: Allda sich auch die linea endert / mit welcher Europa von Grunlandia wird abgesondert.

An dreyen Seiten wird es von dem Meer vmbgeben / dann gegen Orient hat es den Oceanum Sericum, gegen Mittag das mare Indicum, gegen Mitternacht Oceanum Scythicum. Mitten hindurch gehet der Berg Taurus, welcher sich von Orient gegen Occident erstreckt / vnd es fast in zwey Theil theilet / daß ein Theil gegen Mitternacht / vnd das ander gegen Mittag ligt. Gemelter Berg / (oder vielmehr Gebirge) erstreckt sich so weit / als Asia lang ist / nemlich / fünff tausend / sechs hundert / vnd fünff vnd zwanzig Meylen / breitet sich an etlichen Orten auß / bis in drey hundert vnd fünff vnd sechzig Meilen / endert nach vnterschied der Landschaften bisweilen den Namen / vnd wirdt an etlichen Orthen Caucasus, an andern Hircanus, an andern Taurus, vnd an andern Sinai genennet. Sonsten hat Asia, nach der Rechnung Timosthenis, zwey tausend / fünff hundert vnd acht vnd dreissig Meylen in der breite / vnd fänget an dem Schlundt des Fluß Can-